

GARIS PANDUAN KHURAFAT DAN AZIMAT MENURUT PERSPEKTIF ISLAM

**Muzakarah Jawatankuasa Fatwa MKI Kali Ke-40
9 Ogos 1996**

TUJUAN

Garis Panduan ini disediakan untuk memberi kefahaman dan penjelasan kepada umat Islam mengenai aspek-aspek khurafat dan azimat serta pandangan Islam mengenainya.

LATAR BELAKANG

1. Kertas mengenai khurafat dan azimat ini disediakan ekoran daripada keputusan Muzakarah Jawatankuasa Fatwa yang lalu iaitu pada 6 Oktober 1987 supaya kertas mengenai khurafat dan azimat ini diperincikan bagi penjelasannya.
2. Kertas ini mengandungi perkara-perkara berikut:
 - i. Tujuan
 - ii. Latar belakang
 - iii. Takrif khurafat dan azimat
 - iv. Takrif azimat
 - v. Ciri-ciri khurafat dan azimat
 - vi. Bentuk-bentuk khurafat dan azimat
 - vii. Hukum beramal dengan khurafat dan azimat
 - viii. Penutup

TAKRIF KHURAFAT

1. Menurut *المعجم الوسيط* Juzu' 1 (hal. 237), khurafat ditakrifkan sebagai:
"الخراة: الحديث المستلح المكذوب"

Bermaksud: "Cerita-cerita yang mempersonakan yang dicampuradukkan dengan perkara dusta".

2. Menurut kamus المنجد في اللغة والاعلام (hal. 175):

الخرافة ح خرافات: الحديث الباطل مطلقا

Maksudnya: "Khurafah, jama'nya khurafat ialah cerita yang sebenar-benar dusta".

3. Menurut Kamus Idris al-Marbawi (hal. 169) pula, khurafat ialah: cerita karut (karut marut).
4. Dari beberapa definisi yang diutarakan, dapatlah dibuat kesimpulan seperti berikut:

"Khurafat ialah semua cerita sama ada rekaan atau khayalan, ajaran-ajaran, pantang-larang, adat istiadat, ramalan-ramalan, pemujaan atau kepercayaan yang menyimpang dari ajaran Islam".

Berdasarkan takrif di atas, khurafat merangkumi cerita dan perbuatan yang direka dan bersifat karut dan dusta.

TAKRIF AZIMAT

1. Takrif azimat pula menurut المجمع الوسيط (hal. 621) ialah:

"العزمة : الرقية"

Maksudnya: "Azimat : Jampi"

2. Menurut Dr. Yusuf al-Qardhawi di dalam bukunya Fatawa al-Mu'asirah (hal. 189) ialah:

- الرقية -

"أَنْ يُرْقِي الشَّخْصُ وَيُعَزِّمُ عَلَيْهِ بِكَلَامٍ لَا يَفْهَمُ"

Maksudnya: “Bahawa seseorang itu berjampi dan berazimat denganannya dengan kata-kata yang tidak dapat difahami”.

3. Dalam Kamus المُنْجَدُ فِي الْلُّغَةِ وَالْعُلَمَ (hal. 276) juga disebutkan bahawa azimat ialah الرَّقِيمَ iaitu memohon pertolongan/bantuan untuk memperolehi sesuatu perkara dengan menggunakan kekuatan yang melampaui tabii’i.

4. Menurut Kamus Dewan, (hal. 70), azimat ialah:

“Barang (tulisan) yang dianggap mempunyai sakti dan dapat melindungi pemakainya”.

5. Berdasarkan takrif-takrif yang diberikan di atas, kesimpulannya azimat ialah suatu bentuk permohonan untuk mendapatkan pertolongan atau bantuan bagi manfaat diri sendiri atau untuk memudaratkan orang lain dengan menggunakan objek-objek dan ayat tertentu yang dianggap mempunyai kesaktian dan kuasa-kuasa ghaib yang melampaui kekuatan semula jadi apabila dijampi atau dipuja.

CIRI-CIRI KHURAFAT DAN AZIMAT

1. Antara ciri-ciri khurafat ialah:

- i. Ianya tidak didasarkan pada nas-nas syarak sama ada Al-Quran atau Hadith.
- ii. Ia merupakan cerita-cerita rekaan, dongeng, khayalan atau kepercayaan karut.
- iii. Ia bersumberkan kepada kepercayaan-kepercayaan lama dan adat yang bercanggah dengan Islam.
- iv. Ia berbentuk pemujaan dan permohonan kepada makhluk halus untuk tujuan yang memudaratkan dan menyeleweng dari akidah Islam.
- v. Ia menggunakan objek-objek tertentu seperti kubur, pokok dan sebagainya untuk tujuan yang tertentu.
- vi. Ia mempunyai ada unsur-unsur negatif pada akidah dan syariah Islam.

2. Sementara ciri-ciri azimat pula ialah:
- i. Kepercayaan kepada kekuatan sesuatu benda bukan berdasarkan kepada nas-nas syarak sama ada Al-Quran atau Hadith.
 - ii. Menjadikan tulisan-tulisan, rajah-rajah dan objek-objek tertentu sebagai tangkal.
 - iii. Menggunakan jampi serapah yang dicampuradukkan dengan perkara-perkara kufur yang boleh membawa kepada syirik.
 - iv. Berjampi kepada objek-objek atau rajah-rajah yang dicampur aduk dengan ayat Al-Quran untuk tujuan tertentu.

BENTUK-BENTUK KHURAFAT DAN AZIMAT

1. Antara bentuk-bentuk khurafat ialah:
- i. Kepercayaan kepada keramat seperti kubur, pokok kayu, telaga keramat, batu, bukit, tongkat dn sebagainya.
 - ii. Kepercayaan kepada sial majal seperti adat mandi safar, adat mandi membuang sial dan sebagainya.
 - iii. Kepercayaan kepada jin dan memohon pertolongan darinya seperti adat memuja kampung, adat merenjis tepung tawar, adat memuja pantai dan sebagainya.
 - iv. Kepercayaan kepada bertambah dan berkurangnya rezeki seperti adat memuja semangat padi yang dilakukan oleh petani-petani seperti bersemah (memuja semangat padi) dan membuang ancak di sungai dan laut dan bermain pantai.
 - v. Kepercayaan kepada petanda-petanda dan pantang larang seperti tidak boleh melihatkan bayi di muka cermin kerana kelak ia akan mati di dalam air, tidak boleh keluar rumah ketika gagak berbunyi, takut mendapat sial atau bala dan sebagainya.
 - vi. Percaya kepada ramalan-ramalan bintang, angka-angka atau rajah-rajah tertentu.
 - vii. Memuja objek-objek tertentu, roh nenek moyang, kubur-kubur yang dianggap wali dan sebagainya.
2. Sementara bentuk-bentuk azimat ialah:

- i. Menjampi batu cincin, rantai baju, keris dan sebagainya untuk dijadikan pelindung diri seperti ilmu kebal, ilmu pengasih dan sebagainya.
- ii. Membungkus tulisan-tulisan, rajah-rajah atau objek-objek tertentu dengan kain kuning untuk dijadikan tangkal.
- iii. Menjampi tulisan-tulisan yang tidak diketahui maknanya seperti الصلوة dan dicampuradukkan dengan ayat-ayat Al-Quran.
Contohnya:

١١١ م ١١١ ه

الله لا إله إلا هو أكمل القيوم

- iv. Berjampi atau berazimat menggunakan kata-kata dicampur aduk dengan kata-kata sihir dan kufur yang tidak diketahui maknanya.
Contohnya:

“Bikana, makna, Nabi Yakun, Numa Yakun Akulah sebenar-benar Zat Allah”

HUKUM BERAMAL DENGAN KHURAFAT DAN AZIMAT

1. Islam sangat menitikberatkan soal-soal akidah dan syariah. Segala amalan dan kepercayaan yang tidak berdasarkan kepada sumber-sumber yang asal seperti Al-Quran, Hadith, Ijma' dan Qiyas adalah ditolak oleh Islam.

Sabda Rasulullah S.A.W.:

عن عائشة رضي الله عنها قالت : قال رسول الله صلى الله عليه وسلم
من أحدث في أمرنا هذا ما ليس منه فهو رد . (متفق عليه)

Maksudnya: “Barang siapa mengada-adakan dalam agama kami sesuatu yang tidak ada di dalamnya, maka yang dikerjakannya itu adalah tertolak”.

2. Dan sabdanya lagi:

عن عائشة رضي الله عنها قالت : قال رسول الله صلى الله عليه وسلم
من عمل عملاً ليس عليه أمرنا فهو رد . (رواه أحمد ومسلم)

Maksudnya : "Barang siapa mengerjakan sesuatu pekerjaan yang tiada dalam agama kami, maka yang dikerjakannya itu tertolak"

3. Dalam Islam, percaya kepada benda-benda yang dijadikan sebagai benda keramat seperti pokok, kubur, telaga dan sebagainya serta memuja, memohon pertolongan dan melepaskan nazar pada benda-benda berkenaan dan percaya ianya mempunyai kuasa selain daripada Allah SWT adalah membawa kepada syirik dan bertentangan dengan kepercayaan tauhid kepada Allah.
4. Kepercayaan kepada sial, majal dan beramal dengan mandi, seperti mandi safar, jampi dan sebagainya untuk menolaknya adalah syirik dan merosakkan akidah. Rasulullah s.a.w. melarang keras orang yang mempercayai sial.

Sabda Rasulullah:

عَنْ بْنِ مُسْعُودٍ مَرْفُوعًا قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ :
الطَّيْرَةُ شَرِكٌ الطَّيْرَةُ شَرِكٌ وَمَا مَنَا إِلَّا وَلَكُنَّ اللَّهُ يَذْعُمُهُ بِالْتَّوْكِلِ
(رواوه أبو داؤد والترمذى)

Maksudnya : "Percaya kepada burung itu syirik, percaya kepada burung itu syirik dan tiada seorang pun dari kita melainkan dilanda oleh perasaan itu, tetapi Allah akan menghilangkannya tawakal". (Burung yang disebutkan sebagai contoh termasuk seperti biawak, gagak, kelicap).

(Hadith Riwayat Abu Daud dan Termizi)

5. Amalan memuja jin dan memohon pertolongan darinya seperti yang selalu dilakukan oleh sesetengah bomoh dan dukun adalah syirik dan menyesatkan. Orang yang bersahabat dan menggunakan jin seperti tukang sihir dan tukang tenung adalah tergolong dalam golongan orang yang bodoh dan menzalimi diri sendiri.

Ini dijelaskan dalam firman Allah SWT dalam Surah Yunus, ayat 106 yang bermaksud:

وَلَا تَدْعُ مِنْ دُونِ اللَّهِ مَا لَا يَنْفَعُكُ وَلَا يَضُرُّكُ فَإِنْ فَعَلْتَ فَإِنَّكَ هُدًى مِنَ الظَّالِمِينَ .

“Dan janganlah engkau menyembah atau menuja yang lain daripada Allah, yang tidak dapat mendatangkan manfaat kepadamu dan juga tidak dapat mendatangkan mudarat kepadamu. Sekiranya engkau mengerjakan yang demikian maka jadilah engkau orang-orang yang berlaku zalim (terhadap diri sendiri dengan perbuatan syirik itu) ”.

Sabda Rasulullah SAW:

عن أبي هريرة رضي الله عنه قال : قال رسول الله صلى الله عليه وسلم
من أتى عرافاً أو ساحراً أو كاهناً فصدقه بما يقول فقد كفر بما أنزل على
محمد صلى الله عليه وسلم.
(رواه أحمد والحاكم)

Maksudnya : “Barang siapa yang menemui tukang tilik atau tukang sihir dan menanyakan sesuatu kepadanya lalu terus mempercayai apa yang diperkatakannya, maka sesungguhnya ia telah mengkufurkan apa yang telah diturunkan kepada Nabi Muhammad SAW.”

(Riwayat Ahmad dan Hakim)

Sabda Rasulullah SAW lagi:

عن عمران بن حصين قال : قال رسول الله صلى الله عليه وسلم : ليس منا
من تطير ولا من تطير له أو تكهن أو تكهن أو سحر له .
(رواه الطبراني)

Maksudnya : “Bukan dari golongan kami sesiapa yang merasa sial atau meminta diramalkan kesialannya atau merenung nasib atau minta ditenangkan atau mensihirkan atau meminta disihirkan” .

6. Amalan penggunaan azimat atau tangkal sebagai pelindung diri seperti ilmu kebal, ilmu pengasih, ilmu pelemah hati, ilmu penjauh jin dan sebagainya yang dicampuradukkan dengan sihir adalah syirik dan menyeleweng dari ajaran Islam.

Rasulullah pernah bersabda:

عن ابن مسعود رضي الله عنه قال : قال رسول الله صلى الله عليه وسلم :
إن الرفق والتمائم والتولة شرك .

Maksudnya: "Dari Ibn Mas'ud, katanya: Rasulullah SAW telah bersabda: Sesungguhnya jampi mentera, tangkal dan ilmu pengasih adalah syirik".

(Riwayat Abu Daud dan Ahmad)

7. Jampi mantera juga merupakan azimat yang sering kali dilakukan.

Sabda Rasulullah SAW:

عَنْ عُوْفِ بْنِ مَالِكٍ قَالَ : كُنَا نُرْقِي فِي الْجَاهِلِيَّةِ ، فَقَلَدَنَا يَا رَسُولَ اللَّهِ : كَيْفَ تُرْقِي فِي ذَلِكَ ؟ فَقَالَ : اعْرِضُوا عَلَى رِقَاقِمَ لَا يَأْتِي بِالرِّقَاقِ مَا لَمْ يَكُنْ فِيهِ شَرِكٌ .

Maksudnya: "Dari 'Auf Ibn Malik, katanya: Dahulu kami melakukan jampi pada zaman Jahiliyah, lalu kami bertanya: Wahai Rasulullah! Bagaimana pendapat tuan dalam hal ini? Beliau bersabda: Perlihatkanlah kepadaku jampi-jampimu itu. Tidak mengapa melakukan jampi-jampi itu selama tidak mengandungi hal-hal syirik".

(Hadith Riwayat Muslim)

8. Menurut Dr. Yusuf al-Qaradhawi dalam kitab Fatawa al-Mu'asirah, sesuatu jampi itu harus dilakukan berdasarkan kepada tiga (3) syarat:
 - a) Ia mestilah didasarkan kepada Allah SWT dan nama-namanya.
 - b) Ia mestilah dituturkan dengan Bahasa Arab dan kata-kata yang boleh difahami maknanya.
 - c) Beriktikad bahawa ianya tidak memberi kesan dengan sendirinya, tetapi dengan takdir Allah SWT.
9. Dalam amalan perubatan tradisional, terdapat jenis-jenis jampi yang dibolehkan (diharuskan) dan ada yang diharamkan. Jampi-jampi tersebut ialah:
 - a) **Jampi yang diharuskan**
Jampi jenis ini ialah jampi yang menepati tiga (3) syarat seperti yang telah dinyatakan di perenggan 8.

b) Jampi yang diharamkan

Jampi yang ditegah dan diharamkan ialah jampi yang mengandungi unsur-unsur syirik, pemujaan jin, syaitan, menggunakan ilmu hitam atau sihir, menggunakan bahasa-bahasa yang tidak difahami atau yang bercampur aduk, seperti jampi yang dimulakan dengan sebutan Bismillah atau Alhamdulillah dan disertu nama-nama hantu dan jin, kemudian disudahi dengan ucapan ‘berkata-kata Lailaha illallah Muhammadar Rasulullah’ atau seumpamanya.

PENUTUP

Kesimpulannya, segala bentuk khurafat dan azimat sama ada yang berbentuk amalan atau kepercayaan boleh membawa kepada syirik dan bertentangan dengan akidah dan syariah Islam. Adalah diharapkan garis panduan ini dapat memberi panduan dan menjadi rujukan kepada seluruh umat Islam supaya tidak melibatkan diri dengan amalan-amalan dan kepercayaan yang boleh bercanggah dengan ajaran Islam.